

Kommunit aqunneqarnerat pillugu Inatsisartut inatsisaat

Kapitali 1

Aalajangersakkat nalinginnaasut

§ 1. Kommunip susassaqaarfiini kommunalbestyrelsi aqutsisuuvoq.

Imm. 2. Kommunilbestyrelsip kommunip aqunneqarneranut malittarisassat ersarinnerusut tassunga ilanngullugit borgmesterip suliaassaqaarfiinut maleruagassat aqutsinermut malittarisassani suliarissavai. Aqutsinermi malittarisassassatut siunnersuutit aamma malittarisassanut atuuttunut allannguutissatut siunnersuutit kommunalbestyrelsimi minnerpaamik ullunik 14-inik akuttussuseqartumik suliarineqassapput.

Imm. 3. Kommunilbestyrelsip suleriaasissani nammineq akuerissavaa.

Imm. 4. Kommunilbestyrelsip aqutsinermi malittarisassaliimi suleriaasissaminullu aalajangersakkami assilinqarneri Naalakkersuisunut nassiutissavai.

Imm. 5. Naalakkersuisut aqutsinermi malittarisassanik nalinginnaasunik aamma suleriaasissamut maleruagassamik suliaqassapput, kommunalbestyrelsimi allatut aalajangersaasoqarsimatinnagu malinneqartussaasumik aammali maleruagassat qanoq paasineqarnissaannik nalornisoortoqartillugu tunngavigineqartussanik.

§ 2. Kommunip ilisarnaataa kommunimi pineqartumi oqartussaasut kisimik atugassaraat. Taamaattoq ilisarnaatip atorineqarnissaanut qinnuteqartoqartillugu pinerit tamaasa kommunalbestyrelsi akuersisinnaavoq. Ilisarnaatip aningaasarsiutitut atorineqarnissaanik akuersineq akileraaruteqarnissamik piunasaqaatitaqarsinnaavoq.

Kapitali 2

Kommunalbestyrelsi

Kommunalbestyrelsip katitigaanera il.il.

§ 3. Kujataata kommuniani aamma Qeqqata kommuniani Kommunilbestyrelsit 15-inik ilaasortaqaqput. Avannaata kommuniani aamma Kangiata/Kitaata kommuniiini kommunilbestyrelsit 21-inik ilaasortaqaqput.

Imm. 2. Kommunilbestyrelsinut ileqqusumik qinersinissanut ukioq qinersiviusussaq ukiumik sioqqullugu kommunilbestyrelsit aalajangersinnaavaat Kujataata aamma Qeqqata kommuniiini 15-init ikinnerusunik ilaasortaqaqarnissaa, aammalu Avannaata kommuniani Kangiata/Kitaatalu kommuniani ilaasortat 21-init ikinnerunissaat. Ilaasortat amerlassusissaat akunnattuussaq aqutsinermut malittarisassani aalajangersarneqassaaq.

§ 4. Kommunalbestyrelsi qinigaarlaaq qinigaanerup kingorna inissitiserluni ataatsimiissaaq qinersinermi ataatsimiitaliami qinersineq pillugu maalaarutaasimasinnaasunik aammalu ilaasortanngortut qinigaasinnaanerat pillugu naliliisoqareeraangat. Ataatsimiigiaqqusineq allaganngorlugu kommunalbestyrelsimi sivisunerpaamik ilaasortaasimasumit isumagineqassaaq, sivisunerpaamillu ilaasortaasimasut arlaqarpata, taava taakkua angajullersaannit.

Imm. 2. Borgmesterimik qinersisoqareernissaanut kommunalbestyrelsip isumaqatigiinniarnera ilaasortamit ataatsimiigiaqqusimasumit isumagineqassaaq, imaluunniit taanna peqanngippat sivisunerpaamik ilaasortaasimasumit, taakkualu arlaqarpata, angajullersaannit.

§ 5. Kommunip allaffissornikkut suliaasaataasa aaqquissuunneqarnissaat aammalu kommunaldirektørimik atorfinitsitsisarneq soraarsitsisarnerlu kommunalbestyrelsip akisussaaffigai. Borgmesterimik viceborgmesterimillu qinersineq

§ 6. Kommunalbestyrelsip inissitiserfiusumik ataatsimiinnermini aallaqqaasiullugu Borgmesteri akunnerminit qinissavaa.

Imm. 2. Qinigassanngortittoq borgmesteritut qinigaassaaq taasisut affaannit amerlanerusunit qinerneqaruni (amerlanerussuteqavinneq). Qinigassanngortittuni amerlanerussuteqartoqanngippat nutaamik taasisoqaqqissaaq. Qinersineq taanna amerlanerussuteqavinnermik pilersitsinngippat qinigassanngortittut amerlanernit taaneqartut marluk akornanni pingajussaanik qinersisitsisoqassaaq. Qinersinermi taasinerit naligiissimappata makitsinikkut aalajangiineqassaaq.

Imm. 3. Borgmesterimik qinersisoqareerpat kommunalbestyrelsi akunnermini borgmesterip tullissaanik qinersissaaq, borgmesterip pisinnaannginnerani kingoraartaasartussamik. Qinersineq borgmesterimik qinersinermi maleruagassat atuuttut naapertorlugit ingerlanneqassaaq, borgmesterinngortumillu qinersineq siulersorneqassalluni imaluunniit taanna pisinnaanngippat ilaasortamit borgmesterimik qinersinermi siulersuisuusimasumit.

Imm. 4. Aqutsinermut malittarisassami aalajangersarneqarsinnaavoq kommunalbestyrelsi ilaasortami akornanni qinersissasoq borgmesterip tullissaanik siullermik aappaanillu, taaneqartutut tulleriinneqarlutik borgmesterip pisinnaannginnerani kingoraartaasartussanik. § 34 naapertorlugu qanoq amerlassuseqarneq tunngavigalugu qinersineq ingerlanneqassaaq.

Imm. 5. Borgmesterimik aamma borgmesterip tullianik qinersineq kommunalbestyrelsip piffissami qinigaaffiani atuutissaaq.

§ 7. Kommunalbestyrelsimi ilaasorta qinaluunniit pisussaavoq borgmesterimut imaluunniit borgmesterip tullianut qinerneqarnerminik tigusissalluni.

Imm. 2. Qinnuteqartoqarneratigut kommunalbestyrelsip borgmesteri aamma borgmesterip tullia piffissap qinigaaffiup sinnerani atuukkunnaarsissinnaavai.

Imm. 3. Borgmesteri imaluunniit borgmesterip tullia akuerineqarluni atorfimminiit tunuarpat, toquppat imaluunniit kommunalbestyrelsimi tunuarpat nutaamik qinersineqassaaq malittarisassat § 6-miittut naapertorlugit, kommunalbestyrelsip piffissami qinigaaffiata sinnerani atuuttussamik. Borgmesterip tullii marluk qinerneqarsimappata inissaq inuttaaruttoq kommunalbestyrelsimi gruppimit toqqaasimasunit inuttalernerqassaaq.

Kommunalbestyrelsip ataatsimiittarneri, aalajangeeqataasinnaannginneq aammalu peqanngittarneq

§ 8. Kommunalbestyrelsi aalajangiisassaaq qaqugu sumilu ileqqusumik ataatsimiinnerit ingerlanneqartassanersut. Tamanna kommunimi periaaseq naapertorlugu tamanut tusarliunneqartassaaq

ukiut naatsorsuiffiit aallartinneri tamaasa, tamannalu pillugu Naalakkersuisut ilisimatinneqassapput.

Imm. 2. Ukiuni kommunalbestyrelsimut nutaamik qinersiffiusussani ileqquusumik ataatsimiinnissat ullusaa aalajangersarneqartassapput taamaallaat qaammatip kommunalbestyrelsip atuuttup tunuarfissaata naaneranut. Kommunalbestyrelsip qinigaarlaap inissitsiterluni ataatsimiinnermini ukiup sinnerani ileqquusumik ataatsimiittarnissat ullusaa aalajangersassavai.

Imm. 3. Immikkut ittunik ataatsimiinneqartassaaq borgmesterip pisariaqartuutikkaangagu imaluunniit ikinnerpaamik ilaasortat pingajorarterutaasa tamanna piumasarigaangassuk. Borgmesterip aalajangertassavaa immikkut ittunik ataatsimiinnissat qaqugu sumilu pinissaat. Sapinngisamik sioqqutsisumik kommunimi innuttaasut Naalakkersuisullu nalunaarfigineqassapput.

Imm. 4. Borgmesterip sapinngisamik kingusinnerpaamik kommunalbestyrelsip ataatsimiilernissaa ulluinnarnik sisamanik sioqqullugu ullormut oqaluuserisassat allassimaffiat kommunalbestyrelsimi ilaasortanut nassiuttassavaa, kiisalu sapinngisamik kingusinnerpaamik ataatsimiinnissaaq ullunik pingasunik sioqqullugu suliat paasissutissallu ullormut oqaluuserisassani suliasat nalilernissaannut atorineqartussat nassiunneqassapput. Kommunalbestyrelsimi ilaasortat inatsisit naapertorlugit nipangiussisimasussaatitaanermut maleruagassiat killissarititaasa iluanni suliasat kommunalbestyrelsimi oqaaluuserineqartussat inuit kommunalbestyrelsimi ilaasortaanngitsut peqatigalugit misissuataarnissaannut pisinnaatitaapput.

Imm. 5. Kommunalbestyrelsip ataatsimiinnerani suliasanut oqaluuserineqartussanut takussutissiaq aammalu aalajangiinernut imaqarniliaq, inatsisit naapertorlugit nipangiussisimasussaatitaanermut maleruagassiat killissarititaat killigalugit, kommunimi sumiiffimmi ataatsimi arlalinniluunniit saqqummiunneqassapput.

§ 9. Kommunalbestyrelsip ataatsimiinneri tamanut ammasuupput. Taamaattoq kommunalbestyrelsip akuersissutigisinnaavaa suliasat ataasiakkaat matoqqasumik oqaluuserineqarnissaat suliasap qanoq issusia pissutigalugu tamanna pisariaqartinneqaraangat. Suliasap matoqqasumik oqaluuserineqarnissaanut tunngavissaqarnerseq pillugu apeqqut matoqqasumik oqaluuserineqassaaq tamanna kommunalbestyrelsimi imaluunniit borgmesterimit aalajangerneqarpat.

Imm. 2. Kommunalbestyrelsip inuit kommunimi atorfeqartut akuerisinnaavai suliasat matoqqasumik oqaluuserineqarnerat najuuffigisinnaagaat. Suliasap matoqqasumik oqaluuserineqarnerani inuit allat kommunalbestyrelsip aggeqqusinnaavai suliasap nassuiarneqarnissaa pissutigalugu tamanna kissaatiginarpat.

Imm. 3. Nipangiussisimasussaatitaaneq Kalaallit Nunaanni Pinerluttulerinermut inatsimmi naapertorlugu kommunini matoqqasumik ataatsimiinnerni peqataasunut tamanut atuuppoq.

Imm. 4. Naalakkersuisut sinniisaat pisinnaatitaavoq suliasat matoqqasumik oqaluuserineqarneranni najuutissalluni.

§ 10. Immikkut allamik aalajangigaqartoqarsimanngippat suliasap akuersissutigineqarnissaani kommunalbestyrelsimi ataasiaannarluni oqaluuserinnineq pisariaqarpoq.

§ 11. Kommunalbestyrelsi aalajangiisinnaassuseqarpoq ikinnerpaamik ilaasortat affaat ataatsimiinnermi najuuppata. Allamik immikkut aalajangigaqartoqarsimanngippat taasisut amerlanerussuteqarnerisigut aalajangiineqartassaaq.

Imm. 2. Ilaasortaq ataatsimiinnermi peqataasinnaavoq oqarasuaatikkut imaluunniit videokonference telefax-iluunniit atorlugu, ilaasortap piumasaqaatit § 15, imm. 1-imi allassimasut naammassisinnaappagit, aammalu sinniisussamik aggersaasoqarsinnaappat.

Imm. 3. Kommunalbestyrelsip suleriaatsimut maleruagassamini aalajangersarsinnaavaa ataatsimiinnerit oqarasuaatikkut videokonference-tut telefax-ikkulluunniit ingerlanneqarsinnaasut, aammalu attaveqaateqarnikkut periarfissat allat atorneqarsinnaasut.

§ 12. Kommunalbestyrelsimi ilaasortaq kinaluunniit qinikkatut sulinerminut atatillugu suliamut aalajangersimasumut tunngasunik kommunip allaffeqarfiani inissisimasunik paasissutissanik takunnissinnaatitaavoq.

Imm. 2. Suliamik takunnikkumanermik piumasaqaat imm. 1. naapertorlugu saqqummiunneqartoq borgmesterimut ingerlatinneqassaaq.

Imm. 3. Borgmesterip suliamut tunngasumik takunnissinnaanerup annertussusissaa killilersinnaavaa, suliap suliarineqarnerata tamanna pisariaqartippagu, imaluunniit takunnissinnaatitaaneq pissusissamisuunngitsumik ajornartorsiortitsilersinnaappat.

Imm. 4. Kommunalbestyrelsimut ilaasortaq kinaluunniit qinnuteqarnini naapertorlugu suliamut aalajangersimasumut tunngasumi suliap assileneqarnerinik nassinneqarsinnaavoq, imm. 1-3-mi periarfissamik atuinermini. Kommunalbestyrelsili ersarinnerisunik maleruagassiorsinnaavoq suliamut tunngasunik paasissutissanik nassinneqarsinnaanerumut tunngatillugu, tamanna pisariaqartinneqarpat.

§ 13. Kommunalbestyrelsimi ilaasortap kialuunniit kommunip susassaarfii pillugit apeqqutit suulluunniit kommunalbestyrelsimut saqqummiussinnaavai aammalu tamakku pillugit aalajangiinissanut siunnersuutininik saqqummiussisinnaalluni. Paasissutissat kommunalbestyrelsip piumasaqaatigisai ataatsimiititaliat aamma borgmesterip kommunalbestyrelsimut nalunaarutigissavaat, ataatsimiititaliat borgmesterilu - inatsisitigut aalajangersakkamik killissalikkamik - sutigut tamatigut kommunalbestyrelsip aalajangiinerinut maleruuttussaapput.

§ 14. Ilaasortat ilaat suliassami aalajangersimasumi inuttut ima soqutigisaqartiginersoq suliassaq taanna pillugu kommunalbestyrelsip oqaluuserinninnerani taasineranilu peqataanngitsoortariaqarnersoq kommunalbestyrelsip aalajangiiffigissavaa.

Imm. 2. Ilaasortap pissutsinik suliassanilu aalajangersimasuni inuttut soqutigisaqarnini pissutigalugu ataatsimiissutiginninnerni taasineranilu peqataasinnaanerminut nalornisoornartoqartillugu kommunalbestyrelsi ilisimatissavaa.

Imm. 3. Ilaasortaq suliassamut tunngasumi aalajangeeqataasinnaangitsutut oqaatigineqartariaqartoq ilimanarsippat ilaasortat pineqartoq qinigassanngorteqatigalugu qinigaasimasut, aamma kisimiillutik qinigassanngortissimasut, piumasarisinnaavaat suliassap oqaluuserineqarnissaani pineqartup sinniisussaata peqataatinneqarnissaa.

Imm. 4. Kommunalbestyrelsi aalajangiissappat ilaasortaq aalajangeeqataasinnaangitsaq, taassumalu sinniisussaa ataatsimiigiaqquneqanngippat, ilaasortat pineqartumut qinigassanngorteqataasimasut, pineqartorlu kisimiilluni qinigassanngortittuusimappat ilaasortap nammineq piumasarisinnaavaat suliassap tullianik ataatsimiinnissamut kinguartinneqarnissaa. Taamaattoq kinguartitsisoqarsinnaanngilaq ilaasortat najuuttut 2/3-sa tamanna akkerlerippassuk, imaluunniit kinguartitsinissap nassatarissappagu piffissarititaasut kommunip malittarisassai qaangerneqassappata.

§ 15. Ilaasortaq kommunalbestyrelsip ataatsimiinnissaani napparsimanini, naartunini, erninini, meeravissartaarnini, inuiaqatigiinni sullissisussaataitaalluni pisussaaffiligaanini, inuutissarsiutini assigisaalluunniit pissutigalugit ataatsimeeqataasinnaajunnaarpat ilaasortap pisinnaanngitsup qinigaatigisimasaasa, aamma kisimiillutik qinigassanngortissimasut, piumasarisinnaavaat sinniisussap ataatsimiigiaqquneqarnissaa. Inissititserfusumik ataatsimiinnermi, imaluunniit aningaasartuutissanut

missingersuutit aappassaaneerreqarnerannut atatillugu, sinniisussap ataatsimiigiaqquneqarnissaa piumasarineqarsinnaavoq allamik peqquteqarluni ilaasortaq ataatsimeeqataasinnaangippat. Qinigassanngorteqatigiinni ilaasortamik qinikkamik ataatsimiigiaqqusinissamik piumasaqaateqartoqarsinnaangippat sinniisussap nammineq piumasaqaatigisinnaavaa ataatsimiigiaqquneqarnissani.

Imm. 2. Ilasortaq imm. 1-mi oqaaseqatigiinni siullerni taagorneqartunik patsiseqarluni piffissami sivikinnerpaamik qaammatinik marlunnik sivilissusilimmi kommunimi pisussaaffimminik suliaqarsinnaangitsoq borgmesteri ilisimatinneqarluni kommunalbestyrelsiq ataatsimiinnissaanut tullermut siullermut sinniisussaq ataatsimiigiaqqussavaa.

Imm. 3. Kommunalbestyrelsiq aalajangiivigissavaa sinniisussap isernissaanut piumasaasut eqqortinneqarnersut.

Imm. 4. Ilasortap kommunimi pisussaaffini suliareqqissinnaalerpagit sinniisussaq kommunalbestyrelsimi tunuassaaq.

Imm. 5. Borgmesterip imaluunniit borgmesterip tulliaata sinniisussaa imm. 2-mi maleruagassat naapertorlugit isertinneqarpat, pineqartullu pisinnaangikkallarnera sivikinnerpaamik qaammatinik sisamanik sivilissuseqarpat § 6-mi maleruagassat malillugit kommunalbestyrelsiq toqqassavaa kina borgmesterip imaluunniit borgmesterip tulliaata isumagisassaanik isumaginissanersaq.

§ 16. Kommunalbestyrelsiq aalajangiineri allanneqassapput aalajangiinernut imaqarniliami ataatsimiinnerit kingornatigut tamatigut piaartumik ilaasortanit ataatsimiinnermi najuuttunit atsiorneqartussami. Ilasortani taakkunani kinaluunniit piumasaqarsinnaavoq isummani allaasoq naatsumik imaqarniliami allanneqaqqullugu, sulianilu pisortatut oqartussaasunut allanut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaat. Ilasortap taassuma suliaq nassiunneqarnerani suliaq ilaqartissinnaavaa nammineq isummaminut tunngavilersuutigisaminik.

Imm. 2. Borgmesterip isumannaassavaa aalajangiinernut imaqarniliap ataatsimiinnermi peqataasunit atsiorneqarnissaa, aamma matoqqasumik ataatsimiinnermi sammineqartut ilanngullugit.

Imm. 3. Imaqarniliap atsiorneqarnerata kingorna kingusinnerpaamik qaammatip ataatsip qaangiunnerani imaqarniliap nuutinnera borgmesterip Naalakkersuisunut nassiutissavaa.

Kapitali 3

Borgmesterip viceborgmesterillu sulinerat

§ 17. Borgmesterip kommunalbestyrelsiq ataatsimiinnissai piareersartassavaa kommunalbestyrelsimilu ilaasortat ataatsimiigiaqqussarlugit. Borgmesterip Kommunalbestyrelsiq ataatsimiinneri taasinerilu siulersortassavaa aalajangiisarnerrillu imaqarnilianut allattaavinnut allanneqarnissaat isumagissallugu.

§ 18. Borgmesterip kommunalbestyrelsi sinnerlugu suliassat kinguartinneqarsinnaangitsut imaluunniit nalornisoorutaasinnaangitsut aalajangiivigisinnaavai.

Imm. 2. Borgmesterip kingusinnerpaamik ileqqusumik ataatsimiinnermi tulluuttumi suliat imm. 1 naapertorlugu aalajangiiffigineqarsimasut pillugit kommunalbestyrelsi ilisimatittassavaa.

§ 19. Borgmesterip kommunip ulluinnarni allaffissornikkut aqunneqarnera isumagissavaa, suliassat ataatsimiititalianut ataavartunut ingerlateqqittarlugit, kiisalu suliassat kommunalbestyrelsimi aalajangiiffigisariaqartut aalajangiiffigineqarnissaannut naammattumik qulaajarneqarsimanissaat isumagisarlugu. Borgmesterip suliat pineqartut suliarineqarnerat nakkutigissavaa, pisariaqartumillu

ilitersuusiornissat aaqqissuutissallugu.

Imm. 2. Borgmesterip isumagissavaa aningaasartuuteqartoqaranilu isertitassanik isumaginnittoqassanngitsoq pisariaqartumik missingersuusiorneqarsimanngitsunik.

§ 20. Borgmesteri ilaasortaanngikkaluarluni ataatsimiititaliat ataavartut il.il. isumaqatigiinniarnernanni peqataasinnaavoq, taaseqataasinnaanani. Borgmesteri ataatsimiititaliat qaqugu ataatsimiinnissaannik oqaluuserisassallu allassimaffiannik ilisimatinneqartassaaq, aamma ataatsimiinnerit tamarmik imaqarniliorneqarnerannik.

Imm. 2. Borgmesterip ataatsimiititaliat marluk amerlanerilluunniit ilaasortaat katersortissinnaavai, suliassani ataatsimut soqutiginaateqartuni oqaloqatigiissuteqarnissaaq siunertaralugu.

Imm. 3. Borgmesterip suliaq ataatsimiititaliap suliassaqaqfiata iluani suliaasoq unitissinnaavaa, ataatsimiititaliarlu peqqullugu suliaq kinguarsarneqarani kommunalbestyrelsimut saqqummiunneqassasoq. Tamannali atuutinngilaq ataatsimiititaliami aalajangiiffiqineqartartussatut inatsisitigut aalajangersaavigineqarsimasuni.

§ 21. Kommunip illunik pisineranut tunisineranut, taarsigassarsineranut aammalu qularnaveeqquisiisutut imminut pisussanngortinneri pillugit pappiaqqat borgmesterimit imaluunniit borgmesterip tullianit aammalu inummit kommunalbestyrelsimut piginnaatinneqartumit atsiorneqartassapput.

§ 22. Suliassat inatsit manna kommunimilu aqutsinermi malittarisassat naapertorlugit borgmesterimut isumagisassanngortinneqarsimasut borgmesterip pisinnaannginnerani borgmesterip tulliaata kingoraartaagallarnermi isumagisarisassavai.

Imm. 2. Viceborgmesteri kommunalbestyrelsimiit pisussaatinneqarsinnaavoq borgmesterimut paarlattaanissaminut, nalilerneqarpat borgmesteri periarfissaqassanngitsoq akisussaaffimminik qaammatip ulluini 21-ni ingerlatsinissaminut.

§ 23. Borgmesteri inatsit una naapertorlugu imaluunniit kommunimi aqutsinermut maleruqqusaq ulluinnarniluunniit ingerlatsinermut maleruqqusaq naapertorlugit suliassaminik pisussaaffigisaminik suliaqarnissaminut itigartitsippat kommunalbestyrelsip viceborgmesteri peqqusinnaavaa suliassamik pineqartumik isumaginnissasoq.

Imm. 2. Borgmesterip imm. 1.-imi suliassanik pineqartunik suliaqarnissaminut ingasattumik arlaleriarluniluunniit ilaginnaaneratigut kommunalbestyrelsip viceborgmesteri borgmesteriugallartussatut ivertissinnaavaa. Viceborgmesterip suliassat Borgmesterip suliaai tamaasa tigussavai.

Imm. 3. Kommunilbestyrelsip borgmesterip suliunnaarsinnissaanik aalajangernera ingerlaannartumik Kommunit nakkutilliisoqarfiannut nalunaarutigineqassaaq, akuersissutigisassanngorlugu. Aalajangerneq aatsaat atuutilissaaq Naakutilliisoqarfimmiit atortussanngortinneqareeruni.

Imm. 4. Aalajangerneq imm. 3 naapertorlugu ingerlanneqartoq eqqartuussivinnut ingerlateqqinneqarsinnaanngilaq.

Kapitali 4

Ataatsimiititaliat il.il.

Aningaasaqarnermut ataatsimiititaliaq

§ 24. Kommunimi suliassaati isumagineqarnissaat siunertaralugu kommunalbestyrelsi aningaasaqarnermut ataatsimiititaliamik pilersitsissaaq.

Imm. 2. Borgmesteri aningaasaqarnermut ataatsimiititaliami siulittaasuvoq. Ilaasortat sinneri kommunalbestyrelsimi ilaasortat akornannit qinerneqassapput.

Imm. 3. Aningaasaqarnermut ataatsimiititaliami ilaasortat akunnattumik amerlassuseqassapput aammalu kommunalbestyrelsimi ilaasortat affaat qaangersimasinnaanagit. Ilaasortanut tamanut, taamaallaat Borgmesteri pinnagu, sinniisussanik qinersisoqassaaq, taakkualu ilaasortaasut najuussinnaannginneranni ataatsimeeqataasinnaanngorlugit ataatsimiigiaqquneqartassapput.

Imm. 4. Aningaasaqarnermut ataatsimiititaliami ilaasortassanik qinersisoqartassaaq Borgmesterimik viceborgmesterimillu (viceborgmesterinillu) qinersisoqareernerani. Qinigaaneq kommunalbestyrelsip piffissamut qinigaaffianut atuuppoq.

§ 25. Aningaasaqarnermut ataatsimiititaliap suliasai tassaapput:

1) Kommunip iluani suliasaqarfinni tamani aningaasaqarnikkut allaffissornikkullu ingerlatsinermi nakkutilliisuuneq. Suliani taakkunani aningaasaqarnermut ataatsimiititaliap oqaaseqaataa piumaneqartassaaq, suliap kommunalbestyrelsimut aalajangiiffisassanngorlugu saqqummiunneqannginnerani.

2) Akissarsianut sulisoqarnermullu tunngasutigut suliasanik tamakkiisumik isumaginninneq, tassunga ilaallutik kommunimi sulisorisanik atorfnititsisarneq soraarsitsisarnerlu, taamaallaat kommunaldirektørimik atorfnititsisarneq soraarsitsisarnerlu pinnagit, suliaq taanna kommunalbestyrelsimut isumagineqartussaammat.

3) Suliat kommunip aningaasaqarneranut naatsorsuuserineranullu attuumassuteqartut.

4) Aningaasatigut ingerlatsinermut atatillugu tunngaviusussanik maleruagassiorneq, ataatsimiititaliat ataavartut kommunalbestyrelsimut inassuteqartarneranni pituttuisumik maleruarneqartussaasunik, aammalu aningaasaqarnermut ataatsimiititaliap isumagissavaa ataqatigiissaassalluguluunniit kommunip immikkoortunut pilersaarusiornera, ataatsimut atorneqartussanik pilersaarusiornermut maleruagassiornermigut paasissutissallu qanoq annertussuseqarnissaannut aalajangersaanermigut.

Imm. 2. Aningaasaqarnermut ataatsimiititaliap aamma kommunip ingerlatsiviisa allat aqunneqarnerat isumagisarisinnaavaa. Kommunip ingerlatsiviisa allat aqunneqarnerannik aningaasaqarnermut ataatsimiititaliaq isumaginnittuussappat, aqutsinermut maleruagassani aalajangersarneqarsinnaavoq aningaasaqarnermut ataatsimiititaliaq suliaasut naapertorlugit taaguuteqartinneqassasoq.

Imm. 3. Kommunilbestyrelsimi ilaasortat aningaasaqarnermut ataatsimiititaliami ilaasortaangitsut pisinnaatitaapput ataatsimiititaliap ukiumut pilersaarusiorfusumut missingersuusiolfusunullu aningaasartuutissanut missingersuusiaasa inaarutaasumik suliarineqarneranni oqaaseqarsinnaanatik peqataanissaminut.

Ataatsimiititaliat ataavartut

§ 26. Kommunilbestyrelsi aammattaaq ataatsimiititalianik ataavartunik pilersitsisinnaavoq, taakkualu katitsigaanissaat suliasaallu aqutsinermut maleruagassani aalajangersarneqassaaq.

Imm. 2. Ataatsimiititaliani ataavartuni ilaasortat kommunalbestyrelsimi ilaasortat akornanniit qinerneqartassapput aammalu akunnattumik amerlassuseqassallutik, kommunalbestyrelsillu ilaasortaasa affaanit amerlanerusinnaanatik. Ataatsimiititaliani ataavartuni ilaasortanut tamanut sinniisussamik qinersisoqartassaaq, taakkualu ilaasortaasup najuussinnaannginneranni ataatsimiititaliami ataatsimeeqataasinnaanngorlugit ataatsimiigiaqquneqartassapput.

Imm. 3. Ataatsimiititalianut ataavartunut ilaasortassanik qinersineq aningaasaqarnermut

ataatsimiititaliamik qinersereermermi ingerlanneqartassaaq. Qiniganeq kommunalbestyrelsip piffissamut qinigaaffianut atuuppoq.

§ 27. Ataatsimiititaliat siulittaasussatik namminneq qinertassavaat. Ataatsimiititaliami ilaasortaq kinaluunniit pisussaavoq siulittaasutut qinigaanini akuerissallugu. Ataatsimiititaliami siulittaasup ataatsimiititaliap ataatsimiinnissai piareersartassavai, ataatsimiigiaqqusisassalluni ataatsimiinnerit siulersortassallugit ataatsimiinnernilu aalajangiinerit aalajangiinernut imaqarniliamut allanneqarnissaat akisussaaffigalugu.

Imm. 2. Siulittaasup ataatsimiititaliaq sinnerlugu suliassat kinguartinneqarsinnaanngitsut imaluunniit nalornisoorutaasinnaanngitsut aalajangiivigisinnaavai. Suliassani inatsisiliornikkut ataatsimiititaliamut suliassanngortitaasimanngitsuni kinguartinneqarsinnaanngitsunili ataatsimiititaliami siulittaasup aalajangiitinnani borgmesteri ilisimatittassavaa, tamannali atuutinngilaq suliassani ataatsimiititaliamut suliassanngortinneqarsimasuni.

Imm. 3. Ataatsimiititaliami ilaasortap kialuunniit siulittaasup sulinera pillugu apeqqutit suugaluartulluunniit ataatsimiititaliamut suliassanngortissinnaavai, siulittaasullu ataatsimiititaliaq nassuiaatinik piumasaanik nalunaarfigissavaa. Siulittaasoq sutigut tamatigut ataatsimiititaliap aalajangiinerinut maleruuttussaavoq.

§ 28. Ataatsimiititaliat ataavartut sulinertik ataatsimiinnerminni ingerlattassavaat. Ataatsimiititaliat ataavartut aalajangiinnaassuseqartarput ilaasortat minnerpaamik affaat ataatsimiinnermi peqataagaangata. Ataatsimiititaliat ataavartut ilaasortamit piumasaqartoqarnera tunngavigalugu aalajangersinnaapput ilaasortaq tele aqqutigalugu attaveqatigiinnikkut atortorissaarutit iluaqutigalugit ataatsimeeqataasinnaasoq

Imm. 2. Ataatsimiititaliat ataavartut sulinerminni maleruagassartik namminneq aalajangersartarpaat.

Imm. 3. Aalajangiinernut imaqarniliat § 16 naapertorlugu ataatsimiititaliat ataavartut sulineranni malinneqassapput. Ataatsimiititaliani ataavartuni siulittaasut isumannaartassavaat aalajangiinernut imaqarniliat ataatsimeeqataasunit atsiorneqartarnissaat, Naalakkersuisunullu nassiunneqarnissaat.

Imm. 4. Ataatsimiititaliat ataavartut akuerisinnaavaat kommunimi atorfeqartut ataatsimiinnerni najuussinnaanerat ataatsimiititaliap ataavartup allaffissornikkut sullinneqarnera isumagineqarsinnaaqqullugu. Ataatsimiititaliani ataavartuni aalajangerneqarsinnaavoq inuit allat, tassunga ilanngullugit kommunalbestyrelsimi ilaasortat ataatsimiititaliap isumaqatigiinniarnerni alaatsinaattuusinnaasut, tamanna kissaatigineqarpat suliap ersarissaavigineqarnissaanut atatillugu.

Imm. 5. Kommunalborgstyrelsimi ilaasortaq kinaluunniit, nipangiussisimasussaatitaaneq pillugu inatsisiliornikkut maleruagassat killissarititaat killigalugit, qinnuteqareertermigut pisinnaatitaavoq oqaluuserisassat allattorsimaffinik aamma aalajangiinernut imaqarniliat allattorsimaffinik ataatsimiititaliani ilaasortaaffiginngisaraluamini ilaasortaanut nassiunneqartartunik, aammalu qinnuteqareernikkut ataasiakkaatigut suliassanut tunngasunik ataatsimiititaliami ilaasortanut nassiunneqartut assigisaannik nassinneqarnissaminut.

§ 29. Ataatsimiititaliat ataavartut siulersugassaraat imminnut suliassiissutigineqartut ukiumoortumik aningaasanut missingersuusiap akuerineqarsimasup iluani aammalu kommunalborgstyrelsip akuersissutigisimasai allat naapertorlugit. Ataatsimiititaliat ataavartut aningaasat akuerineqarsimasut atuinnermiit nikingannginnissaat nakkutigissavaat aammalu aningaasaqarnermut ataatsimiititaliaq aqqutigalugu kommunalborgstyrelsimut siunnersuuteqassallutik aningaasat ilassutissatut akuersissutissat kissaatiginartutut pisariaqartutulluunniit isumaqarfiginarpata.

Imm. 2. Iliuussat ataatsimiititaliamut allamut annertuumik pingaaruteqartut aallartinneqannginneranni ataatsimiititaliap ataavartup pisariaqartitsineq tunngavigalugu borgmesteri akuutillugu, tak. § 20, imm. 2, ataatsimiititaliaq pineqartoq isumaqatiginiassavaa.

Imm. 3. Ataatsimiititaliat ataavartut aningaasaqarnermut ataatsimiititaliamit piumaffigineqarlutik ataatsimiititaliallu taassuma piffissaliussaata iluani ukiumoortumik aningaasanut missingersuusiassamut aammalu ukiunut tullinut arlalinnut aningaasanut missingersuusiata ilanngutassatik saqqummiutissavaat.

§ 30. Ataatsimiititaliami ilaasortap kialuunniit aalajangiinerup timitalerneqarnissaa unitsissinnaavaa ataatsimiinnermi oqaaseqaruni suliaassap kommunalbestyrelsimut tamarmiusumut saqqummiunneqarnissaa kissaatigigini. Tamannali atussanngilaq aalajangiinernut inatsisit malillugit kommunalbestyrelsimut saqqummiunneqarsinnaanngitsunut.

Ataatsimiititaliat, kommissionit il.il.

§ 31. Ataatsimiititalianut, kommissioninut, siulersuisunut taamaaqataannullu kommunalbestyrelsip aalajangersakkat allat naapertorlugit sinniisoqarfigisassaanut ilaasortassat kommunalbestyrelsip qinissavai.

Imm. 2. Ataatsimiititalianut il.il. ilaasortassanik qinersineq ataatsimiititalianut ataavartunut qinersinerup kingorna ingerlanneqartassaaq. Qinersineq piffissamut kommunalbestyrelsip qinigaaffianut atuutissaaq.

Imm. 3. Aammattaaq kommunalbestyrelsi ataatsimiititalianik immikkut ittunik pilersitsisinnaavoq suliaassat aalajangersimasut isumagineqarnissaannut imaluunniit kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartussanik.

Kommunalbestyrelsip aalajangissavai ataatsimiititaliat immikkut ittut katitigaanissaat taakkulu sulinissaanni maleruagassat aalajangersassallugit.

Ataatsimut aalajangersakkat

§ 32. Kommunalbestyrelsi §§-ini 24 aamma 25 killiliussat iluanni aqutsinermut maleruagassami aalajangersaasinnaapput ataatsimiititaliaqarnermiit allaanerusumik aqutseriaaseqarnissamik.

§ 33. Kommunalbestyrelsimi ilaasortat pisussaapput ataatsimiititalianut qinigaanit akuerissallugit, §§ 24, 26 aamma 31 naapertorlugit, aammalu suliaassat allat kommunalbestyrelsimi imminnut suliaasanngortitaasut ingerlannissaannut.

Imm. 2. Kommunalbestyrelsi sinnerluni suliaqartussanik kommunalbestyrelsimi ilaasortaanngitsunik toqqaasinnaavoq, tamanna inatsisini allani periarfissatut akuerineqarsimappat.

§ 34. Ataatsimiititalianut il.il. ilaasortassanik marlunnik amerlanerusunilluunniit qinersinermi qanoq amerlassuseqarneq tunngavigalugu qinersineq atorpeqassaaq ataatsimiititalianut tamanut.

Imm. 2. Ataatsimiititalianut il.il. borgmesterip pinngitsoorani ilaasortaaffigisassaanut ilaasortassanik qinersinermi borgmesterip inunnguuseralugu inigisaa inissanut qanoq amerlassuseqarneq tunngavigalugu kommunalbestyrelsimi suleqatigiit borgmesterip ataffigisaata pisassaanut ilanngullugu naatsorsuutigineqartassaaq.

Imm. 3. Ataatsimiititalianut il.il. ilaasortassanik kommunalbestyrelsimi ilaasortat ilaasortaanngitsullu akornanni qinersisoqassagaangat ilaasortat kommunalbestyrelsip toqqagassai tamarmik qinerneqassapput qanoq amerlassuseqarneq tunngavigalugu ataatsimiititalianut tamanut. Suleqatigiit ilaasortaataqartussat tulleriiarlutik kommunalbestyrelsimi ilaasortat ilaasortaanngitsullu toqqartussavaat inissat tamarmiusut inuttalerneqarnissaasa tungaanut.

Imm. 4. Qanoq amerlassuseqarneq tunngavigalugu qinersineq ingerlanneqassaaq d'Hondtip periaasia tunngavigalugu imaattunik malittarisarluni: Kommunalbestyrelsip ilaasortai immikkoortunut qinersinissami pineqartumi qanoq taaseqatigiikkumanertik pillugu siulittaasumut nalunaarsimanertik tunngavigalugu avinneqassapput. Suleqatigiit tamarmik amerlassusii 1-imik, 2-mik, 3-mik il.il. agguarneqassapput. Inernerit pissarsiarineqartut aalajangissavaat qanoq tulleriinneqarlutik sinniisorisassaminik qinersisinnaanersut. Inernerit marluk amerlanerusulluunniit assigiippata qanoq tulleriinneqarnissaq makitsinikkut aalajangerneqassaaq. Suleqatigiit ataasiakkaat sinniisorisassaasa amerlassusissaat aalajangerneqarpat suleqatigiit piaartumik borgmesterimut nalunaarutigissavaat inuit kikkut inissani pisassaminni toqqarneqarnersut. Suleqatigiit arlaata ataatsimik arlalinnilluunniit inuttaliisinnaatitaanini atorumanngippagu inissat inuttalerneqanngitsut suleqatigiit allat akunneranni agguarneqassapput periaaseq siuliani taaneqartoq malillugu.

§ 35. Amerlanerussuteqartitsilluni qinersinermi qinigassanngortittoq ilaasortanit najuuttunit amerlanerpaanit taaneqartoq qinigaassaaq. Qinigassanngortittuni amerlanerussuteqartoqanngippat qinersisoqaaqissaaq. Qinersinermi tassani aamma amerlanerussuteqartoqanngippat, pingajussaanik qinersisisoqassaaq, amerlanerpaanik taaneqartut marluk akornanni. Taasinerit amerlaqatigiippata makitsinikkut aalajangiineqassaaq.

Imm. 2. Kommunimi sulilersussamik atorfinitsitsinermi qinnuteqartut arlallit akornanni toqqaasoqartassaaq periaaseq imm. 1-imi taaneqartoq malillugu.

§ 36. Piffissap qinigaaffiup ingerlanerani ataatsimiititaliami taamaaqataaniluunniit ilaasortaq tunuarpat kommunalbestyrelsimilu suleqatigiinnit aalajangersimasunit qinerneqarsimappat inissaq inueruttoq suleqatigiinnit taakkunannga inuttalerneqassaaq.

Imm. 2. Ataatsimiititaliami ilaasortaq najuussinnaanngippat suleqatigiit ilaasortamik qinersisimasut aalajangersinnaapput ilaasortap sinniisussaa, tak. § 15, imm. 2, ataatsimiititaliami ilaasortaagallassasoq ilaasortap najuuteqqilernissaata tunngaanut.

§ 37. Ataatsimiititaliamit aalajangerneqartassaaq ilaasortaq imatut soqutigisaqarnersoq, ilaasortaq ataatsimiititaliap suliamik suliarinninnerani peqataasinnaanani.

Imm. 2. Ilaasortap ataatsimiititaliami siulittaasoq ilisimatittassavaa pissutissaqarpat suliani aalajangersimasuni suleqataasinnaanerminut apeqqutinngortitsisinnaasunik.

Imm. 3. Ilaasortap suliamut aalajangersimasumut sammitillugu suleqataasinnaanera apeqquserneqarsinnaasorineqarpat kommunalbestyrelsimut gruppe-mi qinigaaqatigisimasaani ilaasortat, aammalu ilaasortaq kisimiilluni qinigaasimasuuppat, suleqataasinnaanera apeqquserneqartup nammineq sinniisussamik ataatsimiititaliap sulineranut aggersaasoqarnissaanik piumasaqarsinnaavoq.

Imm. 4. Ataatsimiititaliaq ilaasortap suleqataasinnaannginneranik aalajangiippat, sinniisussamik aggersaasoqarsimanngitsaq, taava kommunalbestyrelsimi ilaasortat pineqartup qinigaaqatigisimasaasa, aamma pineqartut kisimiilluni qinigaasimappat, ilaasortaq nammineq, piumasaqarsinnaapput suliaq tulliani ataatsimiinnissamut kinguartinneqassasoq. Kinguartitsisinnaanerli periarfissaqassanngilaq kinguartitsinerup kingunerissappagu piffissaliussat kommunip pisussaaffigisaasa eqqortinneqarsinnaannginnerat.

§ 38. Ataatsimiititaliami ilaasortaq kommunimi ingerlatsivimmik ataatsimiititaliamit pineqartumit qullersaaffigineqartumik akissarsiaqaatigalugu sulissussissanngilaq, tamanna sioqqullugu tamanut ammasumik suliariumannittussarsiuussisoqareersinnagu imaluunniit pissutsit immikkut ittut pissutigalugit kommunalbestyrelsi aalajangiisimappat.

Imm. 2. Ataatsimiititaliami ataavartumi ilaasortaaneq ajornarpoq:

- 1) ataatsimiititaliamut ataavartumut ingerlatsivimmi pineqartumi akisussaasutut aqutsisuusumut taakkualu tullersortaannut, aamma
- 2) allatut allaffissornikkut akisussaafttaqartumik ingerlatsivimmi aqutsisuusunut, ataatsimiititaliap ataavartup ataaniittumi.

Imm. 3. Aningaasaqarnermut ataatsimiititaliami ilaasortaaneq ajornarpoq atorfilinnut:

- 1) kommunip ingerlatsiviani allaffissornikkut suliaasaqarfinnik § 25 aamma kapitali 5 naapertorlugu aningaasaqarnermut ataatsimiititaliap ataani inissisimasunut,
- 2) akisussaasutut imaluunniit allatut pisortaasutut ingerlatsivimmi inissisimagaanni, aningaasaqarnermut ataatsimiititaliamut attuumassuteqartuni, aamma
- 3) ingerlatsivimmi ingerlatsisuusunut akisussaasutut pisortaagaanni, ataatsimiititaliat ataavartut ataanni.

Imm. 4. Kinaluunniit kommunalbestyrelsimi atorfeqartitaasumut katissimallugu imaluunniit

katissimangikkaluarlugu inooqateqartumut aappaasoq ilaasortaasinnaanngilaq

- 1) ataatsimiititaliami ataavartumi atorfeqartoq imm. 2 naapertorlugu ataatsimiititaliami ataavartumi ilaasortaasinnaanngippat,
- 2) aningaasaqarnermut ataatsimiititaliami atorfeqartoq, toqqaannartumik akisussaasuuppat imaluunniit pisortaaqataappat ingerlatsivimmi aningaasaqarnermut ataatsimiititaliamut imaluunniit ataavartumut attuumassuteqartumi.

Kapitali 5

Kommunip aningaasanut tunngasutigut ingerlatsinera

Ukiunut missingersuutit allallu

§ 39. Kommunip ukioq naatsorsuiffia tassaavoq qaammatisiutit malillugit ukioq.

§ 40. Aningaasaqarnermut ataatsimiititaliap kommunip ukiumoortumik aningaasartuutissanut missingersuutai kommunalbestyrelsimut ingerlatinneqartussat suliarissavai. Siunnersuutit ukiunut tulliuttunut minnerpaamik pingasunut missingersuusianik imaqassapput.

Imm. 2. Ukiumoortumik aningaasartuutissanut missingersuusiani ilaatinneqassapput kommunip isertitassai aningaasartuutissaalu tamarmiusut aammalu aningaasani tigeriaannarni nikerarnerit aamma aningaasaatit nikerarneri.

Imm. 3. Ukiumoortumik aningaasartuutissanut missingersuusiaq tamatigit takussutissaassaaq aningaasartuutissatut isertitassatullu aammalu allatigit nikeriaatissatut ilimagineqartunut.

Imm. 4. Ukiumoortumik aningaasartuutissanut missingersuusiami naatsorsuutigineqassanngilaq taarsigassarsinissaq, attartornissaq imaluunniit leasiinissaq, tamanna Naalakkersuisunit imaluunniit kommunalbestyrelsimi maleruagassat atuuttut naapertorlugit siumoortumik Naalakkersuisunit akuerineqareersimalluni taarsigassarsinissaq, attartornissaq leasiinissarluunniit aaqqiivigineqareersimanngippata.

Imm. 5. Aningaasanut missingersuusiornissamut aamma ilassutitut akuersissuteqarnissamut maleruagassat Naalakkersuisut aalajangersarsinnaavaat.

§ 41. Aningaasaqarnermut ataatsimiititaliap ukiumoortumik missingersuusiai aammalu ukiunut arlalinnut aningaasanut missingersuutai kommunalbestyrelsimi marloriarlugit suliarineqassapput sivikinnerpaamik sapaatip akunnerinik marlunnik akuttussuseqartumik.

Imm. 2. Aningaasanut ukiumoortumik missingersuutit aammalu ukiunut arlalinnut missingersuutaasut marloriarlugu oqaluuserineqarnissaani periaasissat erseqqinnerusut suleriaasissami kommunalbestyrelsip aalajangersassavai.

Imm. 3. Ukiumoortumik aningaasanut missingersuusiap aappassaaneerlugu oqaluuserineqarnissaanut piffissaliussaq Naalakkersuisut aalajangissavaat, aammalu ukiumoortumik aningaasanut missingersuusiap inaarutaasumik akuersissutigineqarnissaani aningaasaliissutit akuersissutigisassat immikkuualuttortassai pillugit maleruagassanik aalajangersaasinnaallutik.

Imm. 4. Kingusinnerpaamik ukiumoortumik aningaasartuutissanut missingersuutit akuersissutigineqarneraniit ullut 14-it qaangiutinnginneranni assilinqarnera Naalakkersuisunut nassiuqqassapput.

§ 42. Ukiumoortumik aningaasartuutissanut missingersuut ukiunullu tulliuuttunut arlalinnut aningaasartuutissanut pilersaarutit akuersissutigineqarnerminniit ullut 14-it qaangiuttinnagit kommunimi innuttaasunit takuneqarsinnaalissapput.

Imm. 2. Ukiumoortumik aningaasartuutissanut missingersuusiap ukiunullu tulliuuttunut arlalinnut aningaasartuutissanut missingersuutit imarisaannut naatsumik nassuiaat ukiup naatsorsuiffiup tulliuuttup aallartinnginnerani kommunimi innuttaasunut saqqummiunneqassaaq imaluunniit najugaqarfimmi tusagassiuutitsigut saqqummiunneqassalluni kommunalbestyrelsip aalajangigaa naapertorlugu.

§ 43. Aningaasartuutissat isertitassallu ukiumoortumik aningaasartuutissanut missingersuutiniittut kommunalbestyrelsip missingersuutininik pineqartunik akuersissuteqarnerminni aalajangiiffigisimasaat, § 40, imm. 3 naapertorlugu kommunip ingerlatsiviinut pituttuisuupput.

Imm. 2. Aningaasanik akuersissuteqartartuuneq kommunalbestyrelsimiippoq. Suliniutit aningaasartuuteqarnermik isertitaqarnermilluunniit kinguneqarsinnaasut, ukiumoortumilli missingersuusiani ilaatinneqanngitsut aallartinneqarsinnaanngillat, kommunalbestyrelsi aningaasartuutissanik akuersissuteqareertinnagu. Iliuusissalli inatsit, peqqussutit imaluunniit inatsisitigut aalajangersakkat allat naapertorlugit pisussaaffusut allatut ajornaraangat kommunalbestyrelsi akuerisimanngisaanik aallartinneqarsinnaapput, kisiannili piaarnerpaamik akuersissuteqartoqarnissaa isumagineqassaaq. Kommunalborgbestyrelsillu aammattaaq aningaasaqarnermut ataatsimiititaliaq pisinnaatissinnaavaa ingerlatsinermi aningaasartuutissanik missingersuutiniittunik nikisiterisinnaanermut kiisalu sanaartugassanut aningaasaliissutinik sanaartugassanut allanut nuussisinnaanermik.

Imm. 3. Ilasutitut aningaasaliissutaasut tamarmik paasissutissanik imaqassapput aningaasartuutissap akuersissutigineqartup suminnagaaniit akilerneqarnissaanik, aammalu ukiunut missingersuusiorfusunut kinguneqartussaansoq ilanngullugu nassuiarneqassaaq. § 41 imm. 3 aamma ilasutitut aningaasaliissuteqarnermi malinneqartassaaq.

§ 44. Naalakkersuisut maleruagassiorsinnaapput kommunit

- 1) taarsigassarsisinnaaneranngut allatigullu akiligassanik pisussaaffilersorsinnaanerannut,
- 2) qularnaveeqqusiisinnaaneranngut allatigullu pisussaaffilersorsinnaanerannut,
- 3) attartornissamut isumaqatigiissuteqarsinnaanerannut aammalu leasingaftale-nik pilersitsisinnaaneranngut
- 4) kommunit inatsit malillugu pisussaaffiginngisaminnik aalajangersimasumik akiliisarnissaminngut neriorsuuteqarsinnaanerannut.

§ 45. Kommunip naatsorsuutaani nalunaarsorneqarsimassapput kommunip aningaasaatai qanoq aqunneqarsimanersut aammalu aqunneqarnerat ukiumoortumik aningaasanut missingersuusianut kommunalbestyrelsillu aalajangiinerinut allanut naapertuuttuunersoq.

Imm. 2. Kommunip aningaasaatai isumannaatsumik paarineqassapput. Aningaasat ullormut atorneqartussat tigorianaatinneqanngitsut aningaaserivimmu ikineqassapput imaluunniit obligationinut aningaasaliinermiluunniit uppersaatinut inissinneqassallutik aningaasaateqarfiit aningaasaataannik inissiiffigineqarsinnaasunut.

§ 46. Kommunip naatsorsuutai aningaasaqarnermut ataatsimiititaliamit kommunalbestyrelsimut saqqummiunneqassapput. Naatsorsuutit ilaqartinneqassapput

- 1) kommunip qularnaveeqqusiinerinut, attartornerinut, leasiinerinut aamma akiliussisussamaataanermik nalunaarutaasa nalunaarsorneqarnerat,
- 2) pisariaqartitsineq naapertorlugu pissutsit qanoq ittuunerannut nassuiaatit, minnerunngitsumik aningaasaliissutaasut naatsorsuutaasullu nikingassuteqarneranni, aamma
- 3) kommunip sanaartugassanut aningaasaliissutaanut pissusiviusut pillugit nassuiaatit, ukiunullu missingersuusiorfiusunut il.il.

Imm. 2. Kommunilbestyrelsip naatsorsuutini nassuiaatit isummerfigissavai aammalu naatsorsuutini immikkuualuttunut malinnaatitsilluni iliuuseqartoqassanersoq, tamatumalu kingorna naatsorsuutit kommunalbestyrelsip kukkunersuiusunut Naalakkersuisunullu ingerlatissavai.

Imm. 3. Naalakkersuisut naatsorsuutit qanoq suliarineqarlutillu saqqummiunneqarnissaat pillugit maleruagassiussapput.

§ 47. Kukkunersuiusup naalagaaffimmit akuerineqartup oqaaseqaatai aningaasaqarnermut ataatsimiititaliamut nalunaarutigineqassaapput. Aningaasaqarnermut ataatsimiititaliaq ingerlatsivinnit aningaasaqarnermut ataatsimiititaliap toqqaannartumik ataaniinngitsunit akissuteqaatinik piumasaqassaaq. Akissuteqaatit aningaasaqarnermut ataatsimiititaliap kommunalbestyrelsimut inassuteqaataani ataatsimoortuni ilaatinneqassapput. Kommunilbestyrelsip alajangiiffigissavaa ukiumoortumik naatsorsuutitut oqaaseqaataasut akissuteqarfigineqarnissaat aammalu ukiumoortumik naatsorsuutit akuersissutigineqarnissaat.

Imm. 2. Kommunilbestyrelsi aalajangeereerpat, tak. imm.1, aalajangiineq kukkunersuiusut naalagaaffimmit akuerineqarsimasut oqaaseqaataat ilanngullugit Naalakkersuisunut nassiuunneqassapput.

Imm. 3. Kingusinnerpaamik ullut 14-it qaangiunneranni ukiumoortumik naatsorsuutit akuerineqarnerannit, naatsorsuutit innuttaasunit pineqarsinnaalissapput.

§ 48. Kommunit tamarmik Naalagaaffimmit akuerisaasunik kukkunersuiisoqassapput, Naalakkersuisunillu kukkunersuiukkat akuerineqartussaapput. Kommunilbestyrelsip Naalagaaffimmit akuerisaasunik kukkunersuiisoq asoortippagu tamanna Naalakkersuisut akuereqqaartussaavaat.

Imm. 2. Naatsorsuutitik kukkunersiuenermi kommunilbestyrelsip sussaarfii tamaasa ilaatinneqassapput. Kukkunersuiuenermi misissorneqassapput

- 1) naatsorsuutit pissusiviusunik ersersitsinersut,
- 2) Naatsorsuutit saqqummiunnerini piviusorsioortunik tunngaveqassapput
 - a) aningaasaliissutit akuersissutigineqartut nalunaarutigineqarsimasut,
 - b) kommunilbestyrelsip aalajangerinik allanik tunngaveqarnerisut,
 - c) inatsisinik peqqussutinillu allanik tunngaveqarnerisut,
 - d) isumaqatigiissutaasimasunik tunngaveqarnerisut aamma

e) ileqquusunik nalinginnaasunik tunngaveqarnersut.

Imm. 3. Kukkuñersuiusut pisinnaatitaapput sukkulluunniit karsi misissussallugu, akuttunngitsunillu kommunip naatsorsuutaanik misissuisassallutik, tassani ilanngullugit nakkutilliinermut aaqqissuussinerit taassuma ataani qarasaasiat atornissaannut maleruagqusat takusinnaajumallugu patajaatsumik ingerlasoqarnersoq.

Imm. 4. Kommunalbestyrelsi pisussaavoq paasissutissat kukkuñersuiinermi pisariaqartut pissarsiarissallugit kukkuñersuiusunullu nalunaarutigissallugit.

Imm. 5. § 48, *Imm. 1* aamma 2-mi aalajangersakkat aamma taamatulli atortinneqassapput kukkuñersuiusut nalunaarutaanni, suliarineqartuni *imm. 3*-mi aalajangersakkat naapertorlugit.

§ 49. Kommunalbestyrelsi maleruagassiussavaa kommunip karsiminik naatsorsuuserinermillu ingerlatsinera, peqqussutitut malittarisassiatut suliarineqartumik. Peqqussut malittarisassiaasoq kommunip kukkuñersuiusunut nassiunneqassaaq, taakkualu allannguutini atulersinneqannginneranni tamatigut ilisimatinneqartassapput.

Imm. 2. Kommunip karseqarneranut naatsorsuuteqarneranullu aqutsinissaq, kukkuñersuiuinissaq aammalu kukkuñersuiusut oqaaseqaataasa aalajangiivigineqarnissaat pillugit maleruagassanik Naalakkersuisut aalajangersaasinnaapput.

Kapitali 6

Nunaqarfinni siulersuisut

§ 50. Nunaqarfinni siulersuisussanik ataatsimoorussanik minnerpaamik kommunip iluani nunaqarfiit marluk peqataaffigisaannik qinersisoqartassaaq. Kommunalbestyrelsi aalajangersassavaa nunaqarfiit sorliit ataatsimoorussassaminnik siulersuisoqartinneqassanersut, aammalu pingasunik tallimanilluunniit ilaasortaqaassanersut. Aalajangerneq pissaaq ukioq nunaqarfinni aqutsisunik ataatsimoorussunik qinersiviususaaq sioqqullugu, ukiup naannginnerani.

Imm. 2. Naalakkersuisut immikkut ittutigit *imm. 1*, oqaaseqatigiit aappaanni aalajangersakkamik saneqqutsinissamut akuersissuteqarsinnaapput, nunaqarfiit avinngarusimasumiittut imaluunniit innuttaqortuut eqqarsaatigalugit. Naalakkersuisut aalajangerni arnerminni oqimaalutarisinnaavaat kommunalbestyrelsit pineqartut nunaqarfinni siulersuisussanik ataatsimoorussanik aalajangersa arnerminni qanoq nunaqarfinnik aqutsinikkut katitsinerimanerat, nunaqarfiit minnerpaamik marlukkaarissaat eqqarsaatigalugu.

Imm. 3. Nunaqarfimmi siulersuisut siulittaasuut piffissamut siulersuisut qinigaaffiannut qinerneqartassaaq, malittarisassat nunaqarfimmi siulersuisut ulluinnarni suleriaasiannik allaaserinnittut tunngavigalugit.

Imm. 4. Nunaqarfinni suliaasaatit aqunneqassapput nunaqarfinni siulersuisunit kommunalbestyrelsinii pisinnaatitsineq tunngavigalugu, aammalu qinerneqartassallutik kommunalbestyrelsinut nunaqarfinni siulersuisunut ilagiillu sinniisaannut qinersisarnermut inatsisartut inatsisaat tunngavigalugu.

§ 51. Nunaqarfimmi siulersuisut sulinissaannut maleruagassat nunaqarfimmut siulersuisut suleriaasissaanni kommunalbestyrelsimiit aalajangersarneqassapput. Maleruagassat kapitali 2-mi aalajangersakkanit uunga tunngasunik saneqqutisuusinnaanngillat,

- 1) allaganngorlugit imaqañilianik suliaqartussa arnermut pisussaaffeqarneq,
- 2) suliani aalajangersimasuni attuumassuteqarneq pissutigalugu suleqataasinnaannginneq,
- 3) imaqañiliani ikinnerussuteqartutut oqaaseqaateqarsinnaatitaaneq.

Imm. 2. Kinaluunniit nunaqarfiup allaffiani atorfeqartoq nunaqarfimmi siulersuisunut

ilaasortaasinnaanngilaq.

Imm. 3. Nunaqarfimmi siulersuisunut ilaasortaasup kialuunniit suliaq ingerlasoq unitsissinnaavaa, ataatsimiinnermi nalunaarutigalugu suliaq pineqartoq kommunalbestyrelsimut imaluunniit kommunimi ataatsimiititaliamut nunaqarfimmi siulersuisut sinnerlugu sullitaannut suliaq saqqummiunneqartussanngortillugu.

§ 52. Nunaqarfimmi pissutsinut tunngasut pillugit nunaqarfimmi aqutsisut kommunalbestyrelsimut inassuteqarsinnaapput. Kommunalbestyrelsip sapinngisamik nunaqarfiup suliaminnut tunngasunut pillugit nunaqarfimmi aqutsisut oqartussaaffigeriinngisaminni apequtini oqaaseqartinneqartassapput.

§ 53. Kommunalbestyrelsimut aningaasaliissutaareersimanngitsunik nunaqarfimmi siulersuisut aningaasartuuteqarsinnaanngillat.

Imm. 2. Kommunalbestyrelsi aningaasanut missingersuusiani aningaasanik immikkoortitsisinnaavoq nunaqarfimmi siulersuisut nammineerlutik aalajangiinnermini atugassaanik makkunani:

- 1) Kulturimut inunnillu paasisitsiniaanermut
- 2) Timersornermut tunngasunut
- 3) Teknikkikkut ingerlatsivinnut pilersuinnermullu
- 4) Nunaqarfimmi inuutissarsiutinut tunngasunik suliniutinut
- 5) Isumaginninnermi suliaasanut.

Imm. 3. Aningaasat atugassanngortinneqarsimasut qanoq atorneqarsimanerannut takussutissatut nunaqarfimmi siulersuisut kommunalbestyrelsimut nassiuttassavai ikinnerpaamik qaammammut ataasiarluni akiligassanut, bankimut karsimullu pappiaqqat, aningaasat qanoq atorneqarsinnaanerannut uppernarsaatitut.

§ 54. Nunaqarfimmi siulersuisut siulittaasuata nakkutigissavaa nunaqarfiup suliassaatai inatsisit aammalu nunaqarfimmi siulersuisut suleriaasaat naapertorlugit ingerlanneqarnersut. *Imm. 2.* Kommunalbestyrelsip nakkutigissavaa nunaqarfimmi siulersuisut ingerlatsinnerminni malittarisassat inatsisartut inatsisaanni pisortallu ingerlatsinerannut maleruagassani allani allassimasut naapertorlugit ingerlatsinerat.

§ 55. Kommunalbestyrelsip nunaqarfimmi siulersuisunut ilaasortat kajumissaatisiaqartissavai Naalakkersuisut § 56, imm. 6 naapertorlugu aalajangersagaasa annerpaaffissaatitaasut iluanni.

Imm. 2. Kommunalbestyrelsip aalajangersinnaavaa nunaqarfimmi siulersuisut siulittaasui ilassutitut kajumissaatisiaqartinniartut.

Imm. 3. Naartunermi, erninnermi meeravissiartaarnermilu Inatsisartut inatsisaata naapertorlugu, nunaqarfimmi aqutsisut akissarsiaminik annaasaqaataanngitsumik sulinngiffeqarsinnaatitaapput,.

Kapitali 7

Nakkutilliineq

§ 56. Naalakkersuisut nakkutigissavaat kommunalbestyrelsit ingerlatsinnerminni inatsisartut inatsisaanni matumani maleruagassat malinneraat, aammalu pisortani maleruagassat atuuttut naapertorlugit ingerlatsinersut.

Imm. 2. Naalakkersuisut nakkutilliissanngillat immikkut maalaaruteqartarfiit nakkutilliisuutitallu aalajangiiffigisinnaasaanni suliaasuni.

Imm. 3. Naalakkersuisut nakkutilliissanngillat atorfiniitsisarnermut maleruagaasunik eqqortitsisoqarnersoq pillugu.

§ 57. Kommunalbestyrelsip isumagissavaa Naalakkersuisunullu nalunaarutigalugu kommunimut tunngatillugu paasissutissat Naalakkersuisut piumasaasa ingerlatinneqartarnissaat.

Imm. 2. Naalakkersuisut kommunalbestyrelsi pisussaatisinnaavaat paasissutissat kommunalbestyrelsip kukkunersiunermut nalunaarutaasumut tunngatillugu aalajangerniarnermini kukkunersiuisumiit tunngavigisimasaasa pissarsiarineqarnissaat pillugu.

Imm. 3. Naalakkersuisut piffissaliisinnaapput imm. 1 aamma imm. 2 naapertorlugu paasissutissat pissarsiarineqarnissaannut tunngatillugu.

Imm. 4. Naalakkersuisut nakkutilliisutut sulinerminnut atatillugu, sulinermi pappilissanik tigusaqarunik, pisortat ingerlatsineranni suliassat sularineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat naapertorlugit nipangiussimaneqartussatut isigineqartunik, taava pappilissat pineqartut ingerlateqqinneqarnerisigut isertuussaajunnaarsinneqassanngillat.

Imm. 5. Naalakkersuisut pisortat ingerlatsivii allat piumaffigisinnaavaat suliassaqaqfimmi iluini siunnersuullutillu ikiuuteqqullugit, nakkutilliinerup naammassiniarneranut pisariaqartumik.

§ 58. Naalakkersuisut aalajangissavaat naammattumik tunngavissaqarnersoq suliap Nakkutilliisoqaqfimmut ingerlateqqinnissaanut.

Nakkutilliisoqaqfik

§ 59. Nakkutilliisoqaqfimmi ilaasortaapput

- 1) Naalakkersuisut siulittaasuat, nakkutilliisoqaqfimmi siulittaasuusoq,
- 2) ilaasortat marluk inatsisartunit inatsisartunut qinersisoqareeneri tamaasa qinerneqartussat aamma
- 3) ilaasortat marluk Kanukoka-mit kommuninut qinersisoqareeneri tamaasa kommunalbestyrelsinut ilaasortanngortut akornanni qinerneqartussat.

Imm. 2. Ilaasortat tamarmik minnerpaamik ataatsimik sinniisussaqaassapput, ataatsimiigiaqqullugit aggersarneqarsinnaasunik ilaasortaasup pisinnaannginnerani.

§ 60. Nakkutilliisoqaqfik minnerpaamik ukiumut ataasiarluni ataatsimiittassaaq, aammalu siulittaasup ilaasortallu pingasut pisariaqartitsinerat tunngavigalugu akulikissuseqarsinnaallutik.

Imm. 2. Siulittaasup qaqugukkut sumilu ataatsimiittoqarnissaa aalajangertassavaa ilaasortallu ataatsimiigiaqqullugit.

Imm. 3. Siulittaasup ataatsimiinnissat sioqqullugit sapinngisamik annertunerpaamik ilaasortat ataatsimiinnermi oqaluuserisassat pillugit ilisimatittassavai.

Imm. 4. Siulittaasup Nakkutilliisoqaqfiup ataatsimiinneri siulersortassavai, isumagissallugulu aalajangikkat imaqaqniliamut allanneqarnissaat, ataatsimeereermilu ilaasortanit ataatsimeeqataasunit imaqaqniliap atsiorneqarnissaa. Ilaasortat tamarmik pisinnaatitaapput allaanerusemik isummernitik imaqaqniliamut nalunaarsortissallugit.

§ 61. Nakkutilliisoqaqfik aalajangiisinnaatitaavoq minnerpaamik siulittaasup saniatigut ilaasortat marluk ataatsimiinnermi najuuppata.

Imm. 2. Aalajangernerni amerlanerussuteqarneq atorneqassaaq. Taasinermi taasisut naligiippata, siulittaasup taasinera aalajangiisuussaaq. Nakkutilliisoqaqfimmi ilaasortat tamarmik pisinnaatitaapput aalajangernerit unitsissinnaallugit, imaqaqniliamullu allatsillugu suliaq Naalakkersuisunut aalajangiiffigisassanngorlugu ingerlateqqinneqassasoq.

Imm. 3. Ilaasortaq Nakkutilliisoqarfiup isumaqatigiinniarnernani taasineranilu peqataasinnaanngilaq, suliaq kommunimut ilaasortap ilaasortaaffigisaanut tunngasuuppat.

§ 62. Siulittaasup Nakkutilliisoqarfiup aalajangigaasa piviusunngortinneqarnissaat isumagissavaa.

Siulittaasup Nakkutilliisoqarfik sinnerlugu suliaq kinguartinneqarsinnaanngitsut imaluunniit nalorninaateqanngitsut aalangiiffigisinnaavai.

Imm. 2. Siulittaasup aalangiinneri ataatsimiinnermi tullermi Nakkutilliisoqarfimmut saqqummiunneqassapput.

Imm. 3. Naalakkersuisut Nakkutilliisoqarfiup allaffeqarfeqarnissaa isumagissavaat.

§ 63. Nakkutilliisoqarfiup sulineranut atasumik aningaasartuutit Landskarsimiit akilerneqassapput.

§ 64. Nakkutilliisoqarfiup kommunalbestyrelsip, Aningaasaqarnermut ataatsimiititaliap taakkualuunniit ilaasortaasa aammalu ataatsimiititaliat ataavartut aalajangigaat atorunnaarsissinnaavaat, aalangerneq inatsisinut atuuttunut unioqqutitsineruppat.

Imm. 2. Suliaq suliarinnerani aalangerneq Nakkutilliisoqarfiup atorunnaarsikkallarsinnaavaa.

Aalangernerli piviusunngortinneqareersimappat, taava taanna taamaallaat atorunnaarsikkallarneqarsinnaavoq

1) suliami susasaqartut arlaata Nakkutilliisoqarfimmut allakkatigut piumasaqaateqarneratigut, aammalu assersuutigalugu inuttut soqutigissat tamanna assortunngippassuk, imaluunniit

2) inatsiliornerup allatigut maalaaruteqarnissaq periarfissaqartinngippagu inuillu soqutigisaasa tamanna assortunngippagu.

Kapitali 8

Akissarsiat

§ 65. Kommunalbestyrelsimi ilaasortanut aalangersimasumik akissarsiaqartitsisoqartassaaq Akissarsiat matussutissaapput

1) kommunalbestyrelsip ataatsimiinnerini peqataanermut kommunalbestyrelsimilu ataatsimiititaliani ataatsimiinnernut taakkunungalu atasumik suleqatigiinni peqataanernut,

2) Kommunalbestyrelsinut qinersereernerup kingorna kommunip sullineranut atasunut ataatsimiinnernut, allanik aalangersakkanik immikkut tunngaveqartumik akissarsiaqartitsisoqanngippat,

3) pikkorissarnermut peqataanermut, kommunalbestyrelsimi imaluunniit aningaasaqarnermut ataatsimiititaliamit kommunalbestyrelsimiit pisinnaatinneqarneq naapertorlugu sulinermut pingaaruteqartutut isigineqartuni, imm. 1 aamma imm. 2-mi suliat pineqartut tunngavigalugit,

4) isumasioqatigiinnernut peqataanermut,

5) kukkunerisuiusut nalunaarutaata saqqummiunneqarnerani peqataanernut,

6) kommunalbestyrelsimi imaluunniit ataatsimiititalianiit piumaffigineqarnerit tunngavigalugit kommunimi sulianik ingerlatsinerit aamma

7) suliaqarnerit allat imm. 1-imiit 6-imut ataatsimiinnerit il.il.

Imm. 2. Kommunalbestyrelsip aalangersinnaavaa kommunimi ataatsimiititaliani ataavartuni siulittaasunut ilassutitut akissarsiaqartitsinissaq.

Imm. 3. Kommunalbestyrelsimi ilaasortanut sinniisutut isertoq alajangersimasumik akissarsiaqartinneqassaaq piffissami kommunalbestyrelsimi suliffigisamini piffissaq pineqartoq minnerpaamik qaamatinik marlunnik sivilissusiarsimappat. Assigisaanillu ilaasortaajunnaarallartup akissarsiai ilanngarneqassapput, piffissaq pineqartoq minnerpaamik qaamatinik marlunnik

sivissususeqarpat.

Imm. 4. Kommunalbestyrelsimi ilaasortaq minnerpaamik qaammatinik marlunnik sivissusilimmik ataatsimiititaliami ataavartumi siulittaasuugallarteq ilassutitut akissarsiaqartinneqassaaq imm. 2 naapertorlugu. Assigisaanillu ataatsimiititaliami siulittaasuujunnarallartup ilassutitut akissarsiai ilanngaatigineqassapput, ataatsimiititaliami siulittaasoq pineqarteq qaammatit marluk sinnerlugit peqanngittussaappat.

Imm. 5. Kommunimi qinikkatut sulinermtut atatillugu Naalakkersuisunit aalajangersakkat naapertorlugit angalanernut najugaqarnernullu ajunngitsorsiaqartitsisoqarsinnaavoq angerlarsimaffimmiit qimagusimasariaqartarnermtut matussutaasunik.

Imm. 6. Naalakkersuisut aalajangersimasunik akissarsiaasaasunik (kajumissaatisiat), ilassutitut aningaasarsiat, ullormusiat akissarsianut annaasanut taartisiassat taakkualu tunniunneqartarnerat missingersuusioreneqartarnerallu pillugit maleruagassiorsinnaapput.

Imm. 7. Kinaluunniit aningaasarsiaassanik kajumissaatisianillu il.il. imm. 1-imiit 5-imut pineqartunik tigusinissaminut pisussaavoq.

Imm. 8. Naartunermi, erninermi meeravissiaartaarnermilu Inatsisartut inatsisaata naapertorlugu, kommunalbestyrelsimi ilaasortat akissarsiaminik annaasaqaataannngitsumik sulinngiffeqarsinnaatitaapput,.

§ 66. Naalakkersuisut maleruagassiussapput:

1) Borgmesterinut akissarsiaqartitsineq, soraarnerussutisiat aamma suliunnaarnermi aningaasarsiaassat pillugit.

2) Viceborgmesterinut imaluunniit kommunalbestyrelsimi ilaasortanut Borgmesterip peqannginnerani paarlattaasunut akissarsiarititassat pillugit.

Imm. 2. Kommunalbestyrelsip Nakkutilliisoqarfimmit akuerineqarluni aalajangersinnaavaa pissutsit § 23, imm. 1 aamma 2-mi pineqartut tunngavigalugit borgmesterip akissarsiaassai apparneqassasut imaluunniit atorunnaarsinneqassasut.

Imm. 3. Kommunalbestyrelsi Borgmesterip piumasaqarneratigut eqqartuussiviit aqqutigalugit suliassanngortitsisinnaavoq imm. 2 naapertorlugu aalajangernerup misilinneqarfigisassaanik.

§ 67. Kommunimi sulisut nalinginnaasumik akissarsiaqartitaanerinut, atorfeqartitaanerinut, soraarnerussutisiaqartitaanerinullu aalajangersakkat, tjenestemandit pillugit inatsisini tamakku aalajangersarneqarsimatinnagit, Naalakkersuisut aamma Kanukoka-p akunnerminni isumaqatigiissutaatigut imaluunniit isumaqatigiissuteqareernerisigut aalajangersarneqassapput.

§ 68. Nakkutilliisoqarfimmi ilaasortat akissarsiaqartinneqassapput Inatsisartuni Naalakkersuisunilu ilaasortat akissarsiaqartinneqartarnerannut Inatsisartut inatsisaat naapertorlugu.

Kapitali 9

Iliusereriikkanut kinguneqartitsinerit taarsiissuteqarnerillu

§ 69. Kommunalbestyrelsi inatsisit naapertorlugit pisussaaffimminik naammassinninngippat, Nakkutilliisoqarfiup kommunalbestyrelsimi ilaasortat ataasiakkaat pisunut akisussaasut pinngitsaaliissutinik akilersuisussanngortissinnaavai.

Imm. 2. Nakkutilliisoqarfik kommunalbestyrelsimut ilaasortamut taarsiissuteqarnissamik piumasaqaateqarsinnaavoq, kommunip annaasaqarneranut akisussaasuusimappat.

Imm. 3. Nakkutilliisoqarfiup suliassanngortitsinini utertissinnaavaa, ilaasortaq pineqarteq piffissaliussap aalajangersimasup iluani aningaasanik aalajangersimasunik kommunimut akiliippat. Akiliutaasussap

aalajangersarneqarnerani akisussaannermik nassuerutiginninneq, ajoqusiinerup annertussusia pissutsillu allat tunngavigineqarsinnaapput. Ilaasortap akiliisussaanini akuerippagu aammalu piffissaliussap iluani akiliutaasusaaq akilerlugu, taava allatigut pineqartumut taarsiissuteqartoqarnissaanik piumasaqartoqarsinnaanngilaq.

Imm. 4. Ilaasortaq taasinngitsoormigut akisussaaffimminik qimarratiginnissinnaanngilaq.

§ 70. Kommunalbestyrelsimut ilaasortaq taarsiissuteqartoqarnissaanik suliaqartoqarnerani taarsiissuteqartussatut akisussaatinneqarpat, kommunimit sulissussinermini piliarisimasaminik, taarsiissutissap annertussusissaa annikillineqarsinnaavoq imaluunniit atorunnaarsinneqarsinnaavoq, pissutsinut akisussaasuunerup nassuerutigineqarnera, ajoqusiinerup annertussusia pissutsillu allat pissutigalugit.

§ 71. Kommunalbestyrelsimut ilaasortaq kommunalbestyrelsimi ilaasortatut pisussaaffimminik sakkortuumik sanioqqutitsisoq akiliisussanngortinneqarsinnaavoq.

Imm. 2. Uparuaaneq imm. 1 naapertorlugu pisoq taamaallaat Nakkutilliisoqarfiup piumasaqarneratigut pisinnaavoq.

Kapitali 10

Atortuulersitsinermut aalajangersakkat

§ 72. Inatsisartut inatsisaat atortuulerpoq ulloq 1. januar 2009.

Imm. 2. Ilutigitillugu atorunnaarsinneqarpoq Inatsisartut kommunalbestyrelsit aamma nunaqarfinni aqutsisut il. il. pillugit inatsisaat nr. 20, 3. november 1994-imeersoq.

Imm. 3. §§ 47-mi aamma 48-mi naalagaaffimmit akuerineqartunik kukkunersiuisoqarnissamik piumasaqaat aatsaat atuutilissaaq 1. januar 2012.

Imm. 4. Nalunaarutit maannamut atuuttut inatsisartut inatsisaat naapertorlugit suliarineqarsimasut kommunalbestyrelsit aamma nunaqarfinni aqutsisut il.il. pillugit, atuutiinnassapput, aalajangersakkat uani inatsimmiittut naapertorlugit allanngortinneqarlutilluunniit atorunnaarsinneqarnissami tungaannut.

Namminersornerullutik Oqartussat, ulloq 5. december 2008

Hans Enoksen

/

Peter Schultz

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut